

**AOKUSO 12, 2018**

**MATAUPU 1: “O LE FOAFOAGA” (The Creation)**

**TUSI FAITAU: KENESE 1: 1 – 10**

**SINI: Ia malamalama le fanau na faia e le Atua mea uma lava o le olaga nei.**

**FESOASOANI MO FAIAOGA:**

E mua’i tuu atu le lima o le faatalofa ma faafeiloa’i atu i lenei foi tausaga faa le a’oa’oga o le a tatou savalia. Ua faamalo folau malo le onosa’i i feau ma tiute ua tofofi ai e le Atua. Ia viia pea le Matai o le galuega i lo outou soifua galulue. Ua tatou i ai i le amataga o lenei foi tausaga aoga ma ua motu atu so outou matūpalapala i le saunoaga a le Faatonu e ala i le ‘Upu Tomua’ o lenei galuega. O lea foi se lagona mo lenei tausaga aoga, ina ia tatou galulue faatasi ae ā se lumana’i manuia o alo ma fanau a le EFKAS ia ma viia pea le Atua i o tatou tagata galulue.

O le ulua’i mataupu ua faaaogaina ai le tala i le foafoaga i le tau faamatalaina o le Atua foafoa. A tatou mafaufau ane i le pogisa ma le leai o se mea i le amataga sei vagana ai le Atua, na Ia filifili ai i lona lava taimi o le a fausia se mea manaia; o se mea e faamatalaina ai o Ia. Ina ia nofo malamalama ai le lalolagi ma mea uma lava na Ia faia, o le Atua e to’atasi na faia mea uma lava. Ua na ona lana fetalaiga ona faia lea o lea mea ma lea mea. O se mea ofofogia! O le a tatou talanoa i lenei taeao i le foafoaga na faia e le Atua i le amataga i ana upu fetalai.

Fai mai le tala i le amataga o mea uma, na gaogao ma soona nunumi le lalolagi ua na o le Atua. E faigata se manatu i se ata o lona vaiata. Auā o se taimi leva i tua atu o tatou tuaā. A’o lei i ai ni tagata, leai ni meaola, leai se lalolagi, leai ni fetu, peita’i ua na o le Atua na i le amataga o mea uma. O le tala lenei ile foafoaina po o le gaōsia e le Atua o mea uma i lona ‘*Mana Fetalai*’.

Ua fai mai le Tusi Paia, ua na ona fetalai atu o le Atua ona tino mai lea o lea mea ma lea mea. Ua Ia fetalai atu ina ‘ia malamalama’ ona malamalama ai lea, ona tu’ueseeseina ai lea o le malamalama nai le pouliuli. Ua tu’ueseeseina foi e le Atua le vai ma le eleele matūtū. Na Ia fausia foi le La, le masina, o fetu ma mea uma o i le va-nimonimo. Na Ia fausia foi manu felelei ma i’a o le sami ma mea uma o loo i ai. Na ia fausia foi manu vaefa ma manu fetolofi e tata’a i le laueleele. Ina ua mae’a ia mea uma; ona Ia fausia lea o le tagata i lona ‘faatusa paia’. E ono aso na faia ai e le Atua mea uma, ae o le aso fitu na malolo ai o Ia mai ana galuega uma lava.

***O manatu e faatauaina (Major points):***

- O le amataga, na leai lava se mea vagana ai le Atua.
- Na fetalai atu le Atua ona tino mai lea o mea uma.
- Na faia e le Atua mea uma o le lagi, lalolagi ma le atu-laulau.
- Na silasila atu foi le Atua ua lelei mea uma (Kenese1:1-31; Ioane1: 1-14).









**SETEMA 09, 2018**

**MATAUPU 5:** "O LE VALAAUINA O APERAAMO (Abraham's Call)."  
**TUSI FAITAU:** **KENESE 12: 1 – 9**  
**SINI:** **Ia malamalama le fanau i le talitonu ma le faatuatua o Aperaamo i lona valaauina e le Atua; e tu'ua lona nu'u a e alu e tali le valaau.**

**FESOASOANI MO FAIAOGA:**

Na valaauina e le Atua ia Aperaamo e tuua lona nuu; a e alu i le nuu o le a faasino atu ia te ia. Ua folafola atu foi e le Atua mo Aperaamo, 'e fai o ia ma tupuga o nuu-tele'. O ana faamanuiaga ia te ia, o le a manuia foi aiga uma o le lalolagi ia te ia, pe afai e faalogo ma usita'i. Na alu lava Aperaamo i lona faatuatua ma le usita'i i le faatonuga a le Atua. Ua ia talitonu i le faamaoni o le Atua i ana folafolaga. O le uiga lata mai o le upu faatuatua; 'o le talitonu lea i mea ua lē vaaia.' E pei ona talitonu ai Aperaamo i le Atua e le o vaaia i mata ae maise lana folafolaga e alu i le nuu e faasino atu ia te ia. E le'i faafitifiti pe tomumu Aperaamo a e na tula'i loa ma alu malaga.

*O manatu e faatauaina (Major Points):*

- Na tupuga mai Aperaamo ma ia Noa.
- Faatonuga: Ia tu'ua le aiga o lou tamā, lou nuu a e alu i le nuu e faasino atu e le Atua.
- E maua faamanuiaga pe afai e faalogo ma usita'i i le faatonuga a le Atua.
- Ua talitonu ma usita'i Aperaamo i le Atua.
- Ua faataunu'uina e le Atua ana folafolaga ia Aperaamo.

Ia faamatala atili uiga o le upu folafolaga po o le tautoga e faia i le va o le Atua ma le tagata; po o le va o le tagata ma le isi tagata. E pei ona folafola e le Atua lana faatonuga ia Aperaamo ina ia tu'ua lona aiga ma lona nuu a e alu i le nuu o le a Ia faasino atu ia te ia. O le folafolaga ma le tautoga lē gausia a le Atua ia Aperaamo pe a faalogo ma usita'i, na te faamanuia ia te ia ma ana fanau. Na filifilia e le Atua o Aperaamo ona o lana amiotonu ma le amiolelei ma ua silafia lelei le faalogo ma usita'i o lenei auauna. O le faatuatua ma le faalagolago o Aperaamo i le Atua o le a faataunu'uina mea uma ua ia folafolaina ma faamanuiaga na te avatu ia te ia.

*A'oa'oga:* O le faalogo ma usita'i o le mea sili lea ona fiafia i ai le Atua. E lē faigofie foi i se tagata ona tu'ua mea ua masani ai ae maise le aiga o lona tamā; auā o lona lea faasinomaga, a e alu e nofo i se isi laueleele e fai mona. Ioe, o le mea sili lea ona taua i le silafaga a le Atua, mo lana fanau ia savavali i le amio sa'o ma le tonu i ona luma. O le usita'i lava lea ma le ola matata'u i Lē na faia mea uma atoa ma o tatou tagata faatauvaa. Ia faalogo outou le fanau i matua, e faamanuia ma faalevavevaina ai lou ola i le nuu o le a foa'iina e le Atua ia te oe.



**SETEMA 16, 2018**


**MATAUPU 6: ISAAKO: TAMA O LE FOLAFOLAGA (Isaac; the Son of Promise).  
TUSI FAITAU: KENESE 21: 1 – 7  
SINI: Ia malamalama le fanau o le faatalitali i le pule a le Atua i lona lava taimi e faataunuúina ai lona finagalo mo le tagata.**

**FESOASOANI MO FAIAOGA:**

O le faatalitali o se mea faigatā. E pei o Aperaamo ma Sarai na faatalitali i se taimi umi lava. O le folafolaga ia Aperaamo ina ia tu’ua le aiga ma le nu’u, a e alu i le nu’u o le a foa’iina e le Atua. O le a avea o ia ma nuu tele ma e toatele lana fanau. I le fitu sefululima o ona tausaga na amata ai ona faatalitali lenei ulugalii mo se tama o le folafolaga. O le folafolaga po o le tautoga le gausia, e faataunu’uina lea i lona lava taimi. O lana pule faitalia foi e faataunu’uina ai i lona finagalo malie, tau o lenei ia tausisi le pito laau a le tagata pei ona faatonuina ai i le feagaiga. Na manino le lē mafai ona faatalitali lenei ulugalii i le folafolaga e fai ilaua ma nuu tele. Ina ua matutua i laua, na tonu ai se manatu o le a saili se isi ala e maua ai se atalii. O lea na avane ai Akara ia Aperaamo ma maua ai Isamaeli, ma le manatu o ia o le tama o le folafolaga. Peita’i, e le o le finagalo lea o le Atua mo le tagata. E le o Isamaeli foi se tama o le folafolaga, auā o lea lava na toe ita i ai le loto o Sara ina ua fanau mulimuli ane lana tama o Isa’ako. E ui ina selau tausaga o Aperaamo na faataunu’uina lava le folafolaga ma le tautoga a le Atua ma na fanau mai ai le tama o le folafolaga ma le gafa ua faaauauina.

O faamanuiaga e amata i totonu o aiga ma e faataunu’uina lava e le Atua i ona lava taimi. E ui ina le lava le onosa’i a le ulugalii, ma uia se isi auala ona o le faaletonu o manatu. Peita’i, na faataunu’uina lava e le Atua i ona taimi ma lona finagalo mo le tagata. E le gata i le faatalitali i lona faaali mai a e tatau foi ona talitonu na te mafaia mea faigatā uma o lenei olaga. E leai se mea e le mafaia e lo tatou Atua.

***A’oa’oga:*** O lea foi se faamanatu mo i tatou le fanau, ia tumau pea le ola faatuatua i folafolaga ma faamanuiaga mai le Atua o manuia. O le a lava se mea ua folafolaina mai e ao i le tagata ona talitonu, faatalitali ma faalagolago e leai se mea e le mafaia e lo tatou Atua mo oe ma a’u. Aua tatou te masalosalo pe fesiligia ana folafolaga auā o le ola anaana lava lea i le Atua. E pule faitalia le Atua i lana taimi e faailoa ai lona silisiliese ma lana pule aoao i mea uma o lenei olaga. O nisi o taimi ua na o nai itula po o nai aso, a o nisi folafolaga pei ona faia ia Aperaamo ma Sara na lata i le 25 tausaga. Ia faatalitali ma onosa’i, faapalepale ma talitonu i faamanuiaga e le Atua.











**NOVEMA 18, 2018**

**‘ASO FAAFETAI’**

**MATAUPU 10:**

**IA FAAFETAIA LE ATUA (We must thank God).**

**TUSI FAITAU:**

**SALAMO 100: 3 – 5**

**SINI:**

**Ia malamalama le fanau ina ia faafetaia ma viia le Atua i mea uma ua tatou maua.**

**FESOASOANI MO FAIAOGA:**

O lagona vivi’i o le fai-Salamo pei ona tatou faitauina i lenei taeao. O se pese tau logologo a’o se faamanatu i le Isaraelu ona nafa ma tiute tauave i taimi ma aso uma e le aunoa. Ua faailoa mai mo tagata uma na faia e le Atua e ao ona vivi’i ma patipatia le alofa ma lona agalelei i taimi uma. Ia alalaga fiafia mea uma na faia e le Atua ona o le tele ma le faula’i o lona alofa. Ia faailoa ma ta’u atu i tuluiga uma o le atu-laulau, auā o Ia lava o le Alii le Atua o Isaraelu ma le lalolagi atoa.

O le faamanatu ia Isaraelu le feagaiga na tofia ai i latou e fai mona nu’u, ae fai o Ia ma o latou Atua. Ia iloa ma malamalama soo se Isaraelu i lona lea faasinomaga ma le Atua osi feagaiga. O le Atua foi na tausia ma leoleoina i latou, o le lafu mamoe ua Ia fagina. Po o fea lava e lele ma alu i ai le Isaraelu e ao lava ona sisi le faamalama ma alalaga fiafia ona o lo latou Atua e toatasi, o Le e ou le viiga, le malosi ma le mana ua lava. O lona alofa e silisili i mea uma e manatu ma lagona e le tagata, e tumau e le liliu e faavavau lava lea.

Afai e foi mai le Isaraelu ma ulu atu i ona faitoto’a ma le viiga, ma ona lotoā ma le pese; ia outou vivii atu ia te Ia, ma faamanū i lona Suafa Paia. O le soifua vivii e faia i aso ma taimi uma e maua ai le avanoa o le Isaraelu, e le tataua ona faa-vaitauina le pese auā o loo le aunoa lona agalelei i lona nu’u. E faamaoni lona alofa e o’o atu i lea tupulaga ma lea tupulaga, pe a tumau ma ola vivii ia te Ia lana fanau e le aunoa. O le faafetai i le Atua ona o mea uma, e ao foi i mea uma ona viia o Ia i aso uma o le tausaga ae maise taimi e maua ai le avanoa.

*A’oa’oga:* O le faamanatu mo le aso ua ta’ua o le ‘Aso Faafetai,’ e leai lava se tasi e tataua ona viia ma faafetai pei o le autū o lenei aso. Fai mai na faa-tauaina e tagata ina ua tele le seleselega o fua o faaéleeleaga na latou maua mai ulua’i fua o a latou faatoaga. Na faamauina o tagata malaga mai i le atu-Eropa na ainā ma faato’aina lau éleele o Amerika i matū. O lo latou faagae’etia ma le viiga ona ua latou selesele le tamaoaiga ma le sosia o lenei lau-éleele fou ona o le pule faasoaa le Atua mo i latou a’o aumau i atunu’u ese. O le matafaioi tausii po o le galuega patino lea mo le au kerisiano ma soo se tupulag talavou, ina ia vivii ma alaga fiafia i le Atua ona o lona tamaoaiga faasoaa e ala i lona alofa ma lona agalelei tausii i lea aso ma lea aso.



**TESEMA 02, 2018**

**MATAUPU 11: O IESU I LE MALUMALU (Jesus in the Temple).**  
**TUSI FAITAU: LUKA 2: 41 – 52**  
**SINI: Ia malamalama le fanau i mea na faia e Iesu i le malumalu a’o 12 ona tausaga.**

**FESOASOANI MO FAIAOGA:**

O le 12 o tausaga o se tama po o se teine e le o se tagata ua matua. O le molimau a Luka i mea na faia e le Alii a’o faato’a 12 ona tausaga. E maofa ai le loto ina ua a’oa’o atu o Ia i totonu o le malumalu a’e le o se tagata na a’oa’oina i le tulafono ma le Tusi Paia. O iina na faailoa ai le mafuta tele o le Alii i le Tusi Paia ae maise le tatalo atu i lona Tamā e le aunoa. Na silafia e Iesu o Ia o le Alo o le Atua, o lea na a’oa’o atu ai ma le poto pei o se tagata ua ia te ia le pule.


***Manatu e faataua (Major Points):***

- O Iesu o Ia o le Alo o le Atua.
- Na tuputupu a’e o Ia ma le malosi, na alofagia o Ia e le Atua ma tagata.
- Ina ua atoa le 12 o ona tausaga na ia a’oa’o atu i le malumalu i tagata e to’atele.
- Na matuā ofo tagata uma ona o le poto na a’oa’o atu ai Iesu.
- Na silafia lelei e Iesu o le Atua na auina mai o Ia.
- Na faalogo ma usita’i o Ia i ona matua o Iosefa ma Maria.

Na tuputupu a’e Iesu ma le malosi, ua faatumulia foi o Ia i le poto ua ia te Ia foi le alofa o le Atua. Na alu o Ia i le malumalu e a’oa’o atu ai i tagata, ua tau faifo le toatele o tagata i le poto ua ia maua. O le soifua mafuta o le Alii i lona Tamā i le tatalo, ae maise lona poto na maua mai i lana suesuega i le Tusi Paia a’o itiiti lava o Ia.

Ua su’e le tama e Iosefa ma Maria; ua alu le po o tau saili o Ia. Fai mai o Iesu i ona matua; ‘se a le mea ua lua saili ai ia te a’u, lua te le iloa ea e tatau ona ou i ai i le Fale o lo’u Tamā.’ O iinā na iloa ai e Iosefa ma Maria ua tupu le poto o le tama o le folafolaga. O le Atalii ua liu-tino tagata ai le Atua ina ia mafai ona faamagaloina agasala a le lalolagi. E ui i lona itu Atua peita’i, na lagonaina tigā, le matuitui ma le sasa na puapuagatia ai, na maliu ai lava ona o lona alofa.

***A’oa’oga:*** O le manatu taua o lenei mataupu, ia saili atu ma maua oe le tupulaga i totonu o le Malumalu tapua’i o le Atua. Ia mafanafana la oulua mafutaga ma le Atua, na te faailoa atu mea lilo ma oloa natia o lona Malo ia te oe. O le faalogo ma usita’i i matua o le tulafono e tasi o loo sau ma lona faasalaga. “Ia e ava i lou tamā ma lou tinā; ina ia faalevaleva ai ou aso i le nu’u o le a foa’iina e le Alii lou Atua ia te oe.” O le soifua o le Alii e faitau le Tusi Paia ma tatalo i aso uma, o se faaitaiga sili foi lea mo i tatou le tupulaga talavou o lenei vaitau.



**TESEMA 09, 2018**

**MATAUPU 12: O IESU O LE EMANUELU (Jesus is thy Emmanuel).**  
**TUSI FAITAU: MATAIO 1: 22 – 23**  
**SINI: Ia malamalama le fanau o Iesu o le Emanuelu; po o le Atua ua ia te i tatou.**


**FESOASOANI MO FAIAOGA:**

O le valoaga a perofeta pei o Isaia, e afio mai le Atua e ala i le tama o le folafolaga. E i lona ua le malo, o le Faipule, ole Silisiliese o le Emanuelu; po ‘o le Atua ua ia i tatou’. O le Alii e atoatoa, e paia foi o Ia e le mafai ona fesoota’i se tagata agasala ma le paia o le Atua. Peita’i, na pau le ala e mafai ai ona faamagalō agasala a le tagata mai le amataga, o le toto o le tama’i mamoe le ponā a le Atua. O le mafuaga lea na liu-tino tagata ai le Atua pei ona molimau Mataio.

E manino o le mausa lea o le tagata soifua, o le agasala pea lava pea. Ua le asa lava se taimi ma le sese o i tatou le fanau. E le gata ua agasala a ua o ese mai foi i le Atua ma ua mamao ai i tatou ma le Alii. O le mea lea na valoia ai ma folafolaina e le Atua i perofeta; ‘o le a to le taupou, e fanau e ia se tama tane e faaigoā foi ia te Ia o Emanuelu (o le Atua ua ia i tatou). O le manatu ina ia soifua le tagata i le olaga sa’oloto mai le pologa o le agasala. E manino le toe foi o le tagata i le agasala pe afai e le talitonu pe faatuatua i le valoaga ma le folafolaga a le au perofeta. O le a auina mai le ‘Puluvaga’ mo Isaraelu ma le lalolagi atoa.

O le molimau a Mataio i le gafa o le Mesia pei ona sau a’i le talafaasolopito o le Isaraelu mai le amataga ia Aperaamo. O le tala na tu’u faasolo mai e augā tamā o le nu’u o le Atua. O le gafa mai ia Aperaamo se’io’o mai i le Alii Faaola. O le aiga ma le fanau, a o le nu’u na fagaina e le Atua mai le amataga. Na to i ai faamanuiaga, e uluola ma avea ma nuu tele ma e tupu mai ia te oe o le na te togilaina le lalolagi. O lea na to laulau e Mataio mai le ulua’i fuaiupu e oo mai i le 23 usuga ma augā tupulaga o le Keriso. O le gafa o le ‘tama o le folafolaga’ ua afio mai ina ia le fano se tagata lava e toatasi, a ia maua e le lalolagi uma le ola e faavavau.

**A’oa’oga:** Ia mautinoa e le fanau o le Atua lava lea ua afio mai i le lalolagi e ala ia Iesu Keriso ina ia magalo agasala o tagata uma. O a’oa’oga ma le mataupu silisili lava lea mai le amataga a la tatou Ekalesia na faavae mai ai. E tataua ona taofi mau ma malamalama lelei i ia taualumaga o la tatou talitonuga, a e sili ai o le soifua ma ola ai i le faatuatua i le Talalelei. Ia mautinoa e le’i tutupu fua ia mau mea pei ona molimauina e le au perofeta ae maise tala a le au fai-evagelia. O le Atua ua faamatalaina ai le tala faasolopito o le tagata ina ia maua le ola ma maua atili ai lava.





















MATI 10, 2019

MATAUPU 21:  
TUSI FAITAU:  
SINI:

**O LE ATALI'I FAAMAUMAU ÓA (Parable of the Prodigal Son).**

**LUKA 15: 11 – 32**

**Ia malamalama le fanau i le tunoa o le alofa faa le Tamā o le Atua, e tusa lava pe soona ulavale le atalii, a e tonu lana faamasinoga.**


**FESOASOANI MO FAIAOGA:**

O le tala ua lauvivilu ai le fanau, atonu e lē tau faamatalaina lenei faataoto e pei ona saunia e le Alii. O le tala ua lau-iloa i le igoa lea ‘O le atalii faamaumau óa.’ E le o aveesea ai le taua ma le autū o lagona na saunia ai e le Alii lenei faataoto pei ona molimau Luka i le tusi faitau o lenei taeao. O loo oga-totonu o le ata le tamā ma ona atalii e to’alua, e foliga lava e autūi le ui’i faamaumau óa lenei faataoto ona o loo faaulutala ai le mataupu. A o totonu o le tala o loo faailo ai e le Alii le tunoa ma le lē faatuaioia o le alofa o le Atua i lana fanau.

E pei ona faamatala mai le Feagaiga Tuai i le lē usita’i ma le sese soo o le nu’u o Isaraelu i le feagaiga ma lo latou Atua. O lea foi ua vaaia i le au Iutaia i le Feagaiga Fou ma le Atua lava lea e to’atasi. Ua faaaogaina ai e Iesu le tamā ma le tutusa o lona alofa i ona atalii e to’alua. O le tala i le ui’i pei ona malamalama ai, o le ola ua le tatau ma o le atalii ua mana’o e vavae ese lona ola mai le aiga ma lona faasinomaga. O le soifua o le tagata ua mana’o i le pule i ana lava mea ma ua pei ua oti le tamā i lona olaga. E ui ina faigata ma le lē usita’i o le atalii faamaumau óa, ae na tamo’e lava le tamā i fafo e faafetaia’i ina ua toe fo’i mai i le aiga. Ua galo le leaga ona o le tele o le alofa ma ua latou fiafia ona o le atalii na se a ua toe maua, na oti foi a ua toe ola mai.

Ua aumaia foi e le Alii le isi amio taa-tele i o tatou tagata e pei ona faatino e le ulumatua. Ua faapito ona lagona mo ia lava ma ua le maua le loto faamagalo atu i lona uso na sē a ua toe foi ifo, na oti a’o lea ua toe ola mai. Ua le iloa se uso ona ua punitia mata i le manatu faapito ma le alofa mo ia lava. O isi ua faatusa le ui’ii tagata o nu’uese e agasala a e tausaili le faaolataga, peita’i le ulumatua ua atagia mai ai le au Iutaia manatu faapito i le Atua. O le tele o le au mapo lotu ma le áu Iutaia ua manatu o le faaolataga ua na o i latou ua ta’ua o le fanau a le Atua.

Ioe, e tuu avanoa pea le Atua peita’i, e faamaoni lana faamasinoga mo lana fanau. E mutimutivale le alofa ma faula’i pea lona agalelei, a e tonu ma moni ona ala mo oe ma a’u. E lē o le manatu faapito le Atua i le atalii faamaumau óa, peita’ie sili atu le manatu o le Tamā i le mamoe na se a ua toe foi mai i le Atua. O loo faailo le tunoa o le alofa o le Tamā mo le lalolagi atoa, e ui lava ina femoumoua’i ma tatou agasala pea; e tumau lona alofa e oo i le faavavau.



MATI 17, 2019

**MATAUPU 22:** O E GALULUE I LE TOVINE (The Workers in the Vineyard).  
**TUSI FAITAU:** MATAIO 20: 1 – 16  
**SINI:** Ia malamalama le fanau e tutusa uma tagata galulue ma lona tau i le silafaga a le Atua po o le Matai o le galuega.


**FESOASOANI MO FAIAOGA:**

O le faataoto i e na galulue i le tovine, o loo a’oa’o mai ia i tatou le alofa le faatuaonia o le Atua e ala i lana faaolataga. Ina ua faa-faigaluegaina e le pule tagata i taimi eseese o le aso, o lona alofa le faatuaonia na totogi tutusa ai i latou. E foliga mai ‘e le fetau (not fair),’ mo nai tagata na muamua faigaluega i le aso atoa ma le mugalā. A e peitai ua faailoa ane e le pule sa malilie uma e maua le totogi mo le galuega; ae lei faapea e totogi e tusa ai ma le umi na faigaluega ai. Ua totogi tutusa e le Matai tagata uma, o e muamua ma e na mulimuli atu.

Ua a’oa’o mai ia i tatou e tutusa uma lava le tau i o i latou e talia ma talitonu i le faaolataga na saunia e ala ia Keriso Iesu. Na fetalai foi le Alii “o e na mulimuli e ave ma muamua ao e na muamua e ave ma mulimuli.” Auā o le faaolataga e le’i maua e le tagata ona o ni ana galuega lelei po o le umi foi e galue ai, ae na maua i le tunoa o le alofa lē faatuaonia o le Atua. O loo faaalua ai foi le pule aoao o le Atua i mea uma na Ia faia e oo lava i o tatou tagata galulue. Ua atagia ai le masani o le olaga, e galue mo se tau i le taimi a le tagata, faata’i o le Atua e silasila i le moni ma le faamaoni o le tagata galue.

O loo faaalua foi le Matai o le galuega, e lē mana’o e nofonofo pe tutū solo ma faamaumau le taimi a le Atua. E le’i mapu foi ona Ia asia le galuega auā na te lē tuufau lana áu fai-galuega i isi tagata galulue. O le Matai e finagalo ia galulue tagata uma e manuia ai le ola. E laualuga ai lona manatu ia tau lava o le faamaoni o le galue e tau lava e tusa ai ma lana galuega. E ui ina manatu le toatele i le lē fetau o totogi ua avane e le Matai, e le’i suia ai lana faai’uga na faia ma le manino. Fai mai a ia, “e te faau’ū ea ou mata ona o lo’u agalelei,” a tu’u i se isi faaupuga; e te pule ea i lo’u alofa? Ua silafia lelei e le Alii natura o tagata Iutaia o lona vaiata, ua latou manana’o e maua filemū le faaolataga ma ua manatu faapito mo i latou lava.

O lea foi se a’oa’oga mo i tatou le fanau, aua le masani e galue mo sou tau. Ae maise galuega faa-le ekalesia pei o fai-aoga Aso Sa, ta’ita’i o Autalavou, aufaipese ma isi punavai e le totogia ia galuega peita’i e fai ma le loto atu o loo silafia e le Atua. Ia saili muamua le Atua ma lona finagalo, ona faamanuia lea ma maua le lumana’i manuia tatou le fanau mai le Alii.



**MATI 24, 2019**

**MATAUPU 23: O LE ATUA O LE LEOLEO MAMOE LELEI (God is the good Sheperd).**

**TUSI FAITAU: SALAMO 23: 1 – 6**

**SINI: Ia malamalama le fanau o le Atua o le Leoleo Mamoe sili ona lelei.**

**FESOASOANI MO FAIAOGA:**

O le isi lenei o tusi faitau sili ona lauvivilu ma faaaogā soo e le toatele o le au faitau. O le tasi o Lau Salamo iloga a Tavita ua lagi faa-pese e le auauna ua mansani i le faiva o le leoleo mamoe e pei ona sa feagai ai a’o talavou. O le faiva e le faigofie le leoleo mamoe, auā e fetaia’i pea ma fili ma faigatā o le ala. O le tasi o galuega po o faiva ua faatusa i ai le Atua e le fai-Salamo. Ua faatusaina le Alii o le Leoleo mamoe sili atu nai lo leoleo mamoe a le-tagata.

O le Salamo o loo faailoa mai ai le faalagolago po o le faatuatua o le tagata i tausiga (caring) a le Atua. O loo faalagi ai le tausiga a le Leoleo mamoe sili e leai se mea e mativa ai le mamoe. O le Atua fai mea sili mo le tagata e mulimulitai ma anaana i ana poloaiga ma tulafono. E ta’ita’i ma faataoto i mea lafulemū ina ia maua le soifua malosi ma saogalemū i taimi uma. O le Leoleo mamoe e malosi ai le loto o le mamoe, fai mai e tusa lava pe asā le vanu o le ata o le oti e le fefe auā ua manino i le malu puipuia ma áao lavea’i o le Leoleo mamoe lelei.

E leoleo e le Atua tagata uma e oo lava i tamaiti ma tagata mama’i. O le leoleo e o’oo’o lana puipuiga i soo se tafa o le vao-matua ma toáfa. Ua ta’ua o le Leoleo mamoe lelei auā e tutusa ia te Ia le lafu atoa. E tuúa e Ia le lafu ae alu e saili le mamoe ua lē iloa seia maua. E faatauaina e le Leoleo mamoe lelei mamoe e mulimulita’i ia te Ia ma faalologo i lona si’ufofoga. E mataáala le Leoleo mamoe lelei i lana tausiga ae maise na te ta’ita’i le lafu i ala o le amiotonu. O le Leoleo mamoe Sili e malilie ai mana’oga o lana lafu, e iloa foi e mamoe lona si’ufofoga.

E faalagolago ma faamoemoe le lafu mamoe i le ta’ita’iga a le leoleo mamoe i taimi uma. O le Leoleo mamoe lelei fai mai e faa-sili ia te Ia le lafu nai lona ola. E pei ona fetalai Iesu i le molimau a Ioane 10:11; ‘O a’u le leoleo mamoe lelei. E tuu atu e le leoleo mamoe lelei o lona ola mo mamoe’. Fai mai upu faai’u a le fai-Salamo, “e moni e mulimuli mai ia te a’u le agalelei ma alofa i aso uma o lo’u ola; ou te nofo foi i le fale o le Alii i aso e tele lava.” O faamanuiaga e maua e le tagata e faalogo ma usita’i i le Leoleo mamoe Sili. Ia iloa ma malamalama le fanau i lumana’i manuia e foa’iina ma taumulimuli i ai le agalelei ma le alofa o le Leoleo mamoe Sili. E ao lava ona soifua ma ola e tatau ai i le finagalo o le Atua o Ia o le Leoleo mamoe





oge, fia áai ma le galala i le fia inu ma isi lava puapuagā ma mala faa le-natura e oo mai. O le fiafia loloto o lana fanau, e malu puipuia i tatou pe a tatou faatagaina le Atua i o tatou olaga.



**APERILA 07, 2019**

**MATAUPU 25: O LE ATUA O LO’U MALAMALAMA (God is my light).**  
**TUSI FAITAU: KENESE 1: 1 – 3**  
**SINI: Ia iloa e le fanau o le Atua o le malamalama moni Ia o le lalolagi.**

**FESOASOANI MO FAIAOGA:**

A o tatou i ai i le faasologa o mataupu i le faamatalagaina o le Atua e le Tusi Paia, ua tatou oo mai i le ‘malamalama’ lea ua faatusa i ai le Atua. O le mea na mua’i faia e le Atua auā sa soona nunumi o lenei lalolagi i le amataga. O le molimau a le Kenese i upu amata o le foafoaga, ua na ona ‘fetalai’ atu o le Atua ona i ai lea o le malamalama. Fai mai foi le Salamo 27, “O le Alii, o lo’u malamalama ia...o ai ea se ou te fefe ai?” Ina ua oo i le Feagaiga Fou, ua faatatau e Ioane 1: 3 lana molimau ia Iesu Keriso o le malamalama moni Ia o le lalolagi.

O upu Eperu o loo faasino i le malamalama i le Feagaiga Tuai o le ‘*or*’ mai le Feagaiga Fou faa-Eleni - ‘*phō*’; o la uiga lata mai o se mea na te aumaia le iloa, pupula, iila, po o le susulu atu ina ia faamalalamaina ai le pogisā. Ae a tatou toe to manatu i le molimau a le Kenese pei ona aumaia i luga, na mua’i faia e le Atua le malamalama ae le’i faia le la, fetu, masina ma nisi mea latou te aumaia le malamalama i le lalolagi e oo foi i le vavaeina o le ao ma le po. O lona uiga o le Atua o le ‘malamalama’po o le ‘ola’ Ia o le lalolagi, e lē tau faamalalamaina i isi malosiaga susulu atu pei o le la ma le masina po se afi foi.

O le mea lea e fia faailoa i le fanau o le Atua o le ‘malamalama’, o lona uiga e mafai ona maua ai le ola, iloa, susulu mai, ma pupula atu mai ia te Ia lava. O le manatu laualuga foi lea o le mataupu ina ia faalagolago le tagata i le malamalama o le Atua, e aumaia le ola, le poto, le ala e savali tonu ai ma le iloa e talia ai faaaliga a le Agaga Paia. E foliga e faigofie le mataupu ae o loo taoto i le faatuatua o le tagata ua taliaina le malamalama moni o le Atua. O le manatu e tau le faa-malamalamaina le pogisā pe a iloa e le tagata le Atua. O le tagata e iloa ma talitonu i le malamalama moni o le Atua e maua le ola ma ana faamanuiaga.

E mafai foi ona tatou toe tepa ia i latou o loo tauaso i totonu o le Tusi Paia. A e na faapupulaina e Iesu ona o le soifua e tusa ai ma le malamalama o le Atua. O le tagata e tauaso faa le-tino ae o loo pupula mata faa le-agaga, e manino la latou vaai atu i le malamalama o le Atua.



















le toe vaivai o tatou loto ma tumau i la le Agaga e faavavau. O le Agaga o le Atua e mafuta ma faamalosia i lo tatou vaivai i tami uma e le aunoa, auā o lo tatou Fesoasoani Sili mai le Atua lea.

<<<<<<<<<<<<< ***Manuia Tele le Malologa ma le Tu'uaga mo le Fanau!*** >>>>>>>>>>>>>>>>>>>>>>>>>>>>>